

欽定剿平粵匪方略

欽定勦平粵匪方略卷四百十一 乙丑年

九月十七日

己卯

劉坤一奏言濂逆汪海洋因聞

粵官兵堵截仍圖竄越江西冀犯兩湖以延殘  
喘自平遠敗後晝夜西竄旋入興甯之龍虎墟  
直趨羅浮司圖犯長甯篁鄉堡席寶田等當卽  
知會提督周寬世等嚴防篁鄉雞公兩口一面  
各取捷徑疾馳勦捕八月十四日周寬世進紮

篁鄉堡前五里之葛蒲塘以扼長甯門戶探知  
汪逆大股盤踞羅浮司等處分股千餘人至蕉  
阮擄掠十五日周寬世出隊往擊賊見官軍登  
時驚逸是日婁雲慶派吳雲集等馳抵篁鄉助  
勦十六日逆衆由羅浮司竄龍川之赤石渡等  
處徧近江境十七日周寬世出龍川之上坪迎  
擊大埔墟之賊吳雲集等出龍川之牛形岡兜

勦湖背之賊周寬世行至下村地方僞祐王李  
逆率黨四五萬人盪擁來撲周寬世督軍  
槍礮連施斃匪三百餘名賊漸不支熊惠堂等  
兩路包抄周寬世率親兵直搗中堅復斬僞天  
將陳逆及匪黨六百餘人賊始大潰狂奔我軍  
追至石窖地方賊墮崖落水死者甚衆吳雲集  
等行至湖背遇汪逆前隊僞周王汪麻子僞天

將李逆率衆分左右兩路拒敵吳雲集等亦分  
路進擊斃匪無數汪麻子負創而走賊隊遂亂  
官軍乘勢衝突陳慶福中槍陣亡各營憤甚縱  
橫盪決陣斬僞朝將等賊目多名斃賊千餘名  
生擒百餘名餘匪四散逃竄該逆遭此巨創不  
復再窺長甯全股竄過黃貝嶺直趨小山背蘇  
毛坪窺伺定南信豐十九日王開琳率隊往勦

行抵細坳遇汪逆頭隊四五千人由絲毛坪而  
來王開琳等迎頭轟擊羅璫山等兩路包抄賊  
衆驚潰我軍追過細坳斃賊無算該逆後隊踵  
至王開琳斷其歸路該逆拚死惡戰我軍四面  
衝殺後隊之賊翻山而遁沿途追殺數百名生  
擒三十餘名二十一日逆衆由小山墟青龍墟  
竄至瑤田地方距鵝公墟僅十餘里汪逆大股

尚蹕青龍等墟二十二日王開琳督率各營進  
剿甫過烏鴉寨見匪衆六七千人排列山岡田  
隴王開琳飭鄧仕商等張兩翼以進包抄賊後  
自率方友才繼進以劈山礮擡槍連環轟擊陣  
斬騎馬賊目十餘人斃匪五六百人我軍乘勝  
急進山谷伏賊突起敗賊亦回頭死戰適鄧仕  
商等由旁橫衝賊陣該逆大敗奔潰我軍併力

掩殺復斃匪千餘人追逐二十餘里小山墟另  
出逆衆來撲王開琳揮軍奮擊賊皆披靡屍相  
枕藉餘匪奪路狂奔我軍追過小山墟沿途復  
殲斃多名共計斃賊六千餘名生擒七八百名  
汪逆因鷓公墟未能衝入遂改竄定南廳之天  
花寺下厯司一帶二十三日股已至龍南縣  
城下攻撲東門經該縣知縣王家傑率同官兵



守禦各鄉團勇聞警馳援殺賊多名逆匪退紮  
南門外之河東查汪逆旨死出竄屢爲我軍截  
殺斬擒收降逾數萬人賊勢業已大挫祇因江  
粵毗連地面遼闊防不勝防該逆現山定南竄  
犯龍南幸席寶田周寬世已抵信豐攔截婁雲  
慶亦經繼進王開琳復至定南跟追臣已飛檄  
各營前後夾擊並催劉連捷朱洪章兩軍速赴

南安堵禦卽令兼顧湖南惟聞該逆分股狂竄  
晝夜兼馳萬一闕入江楚腹地關繫匪輕臣於  
初八日隨帶親兵一百名馳赴贛州妥籌戢守  
並與督臣左宗棠就近會商聯絡三省官軍共  
圖剿滅此次席寶田等軍沿邊堵剿屢獲勝仗  
均屬異常出力可否容臣擇尤併案保獎陣亡  
之擬保遊擊銜都司陳慶福等相應開列請

旨飭部分別議卹奏入

上命軍機大臣傳諭左宗棠瑞麟劉坤一郭嵩焘曰  
汪逆大股由鎮平竄出盤踞羅浮司繞入江西長  
甯縣之篁鄉堡經周寬世等迎擊獲勝賊蹤改竄  
定南復經婁雲慶等擊敗現撲龍南勢尙臨張劉  
坤一已帶親兵馳往贛州督勦卽著督飭將士迅  
籌掃蕩毋令闖入江西腹地左宗棠有節制三省

之責務令派兵越境夾擊不可稍涉延緩鎮平一  
帶是否尙有餘匪著瑞麟郭嵩燾實力搜捕毋留  
餘孽南韶一帶兼須嚴防回竄賊蹤飄忽異常恐  
其西竄湘省著劉坤一咨照李瀚章一體嚴防出  
力將弁准其併案保奏陣亡之都司陳慶福著照  
遊擊銜議卹都司謝登科張坤能把總瞿明東劉  
大發均著交部從優議卹

十九日辛巳瑞麟郭嵩燾奏言濂逆逃至石正大

柘官紳兵團沿途追勦八月十二日賊至洋商  
湖我軍從旁突擊斃匪二百餘名槍斃偽天將  
陳義光於馬下賊棄營狂奔十三日己革副將  
林保等伏兵山坳另分兩路包裹該逆行抵大  
坪伏兵齊起各軍聞聲抄截斬偽朝將洪瞬偽  
先鋒蕭凱騰斃匪五六百名該逆大股夜竄黃

陂提督高連陞等追斬無數復竄至黃貝嶺巖  
下該處緊接江境時花旗餘匪勦撫幾盡該逆  
失其內援遂於十九二十等日由江廣亭趨江  
西之定南龍南等處而逸先是花旗股匪闖入  
長樂縣城總兵卓興等圍攻城下截斷逆黨趙  
金幅李新有等數千人不能入城初走甯屬中  
道亭繼回龍川屬赤岡地方經兵勇疊次擊敗

逸入巖下屯聚招誘土匪共萬餘人勢將復振  
自長樂克復後副將鄭紹忠等前往督辦進扼  
牛皮潭副將朱國雄等由四都過河馳至上游  
堵截斃匪百餘名焚燬路口賊卡六座賊退守  
巖下鄭紹忠揮軍四面圍困該逆勢窮力竭十  
一日賊目李新有翟明海等將僞天將趙金幅  
縛送鄭紹忠大營乞降李福泰斬趙金幅於軍

前餘黨七千餘人薙髮繳械陸續遣散至髮匪  
屬聚鎮平數月以來且勦且撫祇存濂逆汪海  
洋來逆陸瞬得兩股而濂逆又以來逆爲前驅  
自來逆被誅鎮平屢經攻勦濂逆乃傾巢而出  
由江廣亨遁入定南龍南該處與粵境交錯可  
以直達南雄粵省東路稍鬆北江又形喫緊臣  
等已飭李福泰由嘉應移紮龍川居中調度令



鄧安邦一軍專守巖下防賊回竄吳贊誠與方  
耀由羅浮司跟蹤馳勦鄭紹忠全軍速赴南雄  
僞賊已深入江境卽商同方耀齊赴會勦曾紀  
鳳曾敏行兩軍計程將抵南雄北路防軍尙數  
守禦高連陞暫駐興甯臣等酌撥洋槍三百桿  
及軍火餉銀委員解往以備要需奏入

上諭曰前據劉坤一馳奏已諭令瑞麟等嚴防回竄

著懷遵前旨勿令關入南韶其花旗餘匪迅速搜捕淨盡

二十三日 乙酉 李瀚章奏言汪海洋賊股屢爲江

閩官軍所敗拌死狂奔 臣當飭將領嚴陣以待

一面咨請廣東督撫 臣迅飭水師將弁嚴扼北

江一帶水道並將韶河下游淺澗可涉之處加

意攔截以杜竄越復飭按察使陳士杰所部進

扼蠟嶺楓木坳參將彭炳武等馳赴桂東總兵  
王永豐派兵進紮望嶺按察使趙煥聯派總兵  
張文貴等由軍堡坳文明司先赴風門坳等處  
扼駐該司親督各營由野豬坳鵝頸坳偵賊所  
向東顧桂陽西援宜章臨武連日據報逆衆圍  
攻江西之定南龍南兩城經官軍擊退竄至龍  
定之交其勢左可出始興以達仁化曲江右可

走信豐以窺江西中可從龍南以趨南雄該逆  
死黨尙有數萬慮其逸入西路則陽山連州連  
山及廣西邊境在在空虛楚省南界亦與兩粵  
接壤千有數里防不勝防臣現飭各將領審機  
進擊如賊竄向乳源出梅花塘則右通平石宜  
章左通臨武地勢平衍處處戒嚴在防各軍卽  
宜星夜繞赴三堡鳳頭嶺四喜水東牛市一帶

以遏竄突惟楚軍備多力分實形單薄查藩司

劉連捷總兵朱洪章朱南桂三軍自金陵克復

本應凱撤經督臣曾國藩撫臣劉坤一先後調

赴江西前准曾國藩咨稱該三軍應撤應留由

臣酌量調遣如果賊蹤西竄則江西情形自鬆

臣當調令來楚以助兵力又與劉坤一豫商儘

逆氛竄近湖南卽請飛飭臬司席寶田一軍兼



鋒瑞麟郭嵩燾當飭水師將弁嚴扼北江一帶水道其韶河下游並著加意攔截嚴遏竄越張凱嵩尤須迅調勁兵將粵西邊境扼要防守毋令賊蹤竄入現在賊勢敗挫奔突靡常亟應乘勝勦滅如果賊向西趨劉坤一務當迅令席寶田一軍馳赴楚省併力會勦湖南備多力分實形單薄劉連捷朱洪章等軍如能赴楚追勦自可稍助兵力著左

宗棠劉坤一會商調派毋失機宜

二十四日

丙戌

左宗棠徐宗幹奏言高連陞等軍

克復鎮平後汪逆圖竄平遠八尺地方適婁雲  
慶劉典等軍馳至遂折向大柘竄走後隊尙踞  
河頭鄉劉典所部副將張福齊等於八月十三  
夜分道疾進擒斬千餘名都司蕭雅泗等收降  
賊目僞朝將何人傑等六百餘人高連陞康國



器等軍追勦敗賊至東石鄉楓葉坑等處斬馘  
四五千名餘匪分竄黃陂墟羅浮司十四日高  
連陞等復追至黃陂墟之高坳斃匪約七八千  
人汪逆奪路狂竄乘夜向羅浮司遁去總兵劉  
清亮跟蹤追擊十六日殲斃後隊悍賊無算該  
逆狂奔赤石司前隊由閒道出黃貝嶺竄至絲  
毛坪距江西長甯鵝公墟五十里十九日經已

革總兵王開琳等前後夾擊賊大敗潰官軍沿途追殺數百名生擒長髮老賊三十餘名連日共計斃賊一萬數千名解散不計其數據獲賊供稱汪逆悍黨已殲除及半其僞東平王等及霆營叛勇黃矮子各股則已殲除逃散殆盡頃據各路稟報賊蹤已竄至長甯交界之小山墟青龍墟洋坑一帶賊黨無多江軍席寶田婁雲

慶兩軍已由平遠折回長甯王開琳周寬世兩軍分扼長甯之篁鄉堡鵝公墟等處賊如由此路竄江西則江軍截其前閩軍躡其後自可共收夾擊之效惟高連陞所部兵力尙單臣左宗棠已飭劉清亮康國器關鎮邦各軍統歸高連陞節制調遣由粵東躡蹤前進爲追勦之師劉典所部由江西會昌安遠信豐直趨南安黃少

春一軍由平遠信豐繼進冀助江西之防而扼  
湖南之隘爲攔擊之師計兩路出境及先駐江  
境王開琳一軍已近三萬人福建得勝之軍除  
蘇軍八千遣回江蘇王德榜一軍回駐閩境外  
餘悉資遣以行矣臣宗棠俟各路軍事及轉運  
事宜布置就緒再旋省署其王德榜一軍凱旋  
後應暫留清泉一帶搜勦餘匪以資鎮壓

左宗棠徐宗幹又奏言正拜摺開據延建邵道  
康國器稟報八月十四日康熊飛吳光亮等隨  
同高連陞追賊至黃陂墟獲勝後十五日高連  
陞仍率隊先進康熊飛等繼之連發偵探不見  
一賊詢之土人僉稱賊衆連夜狂奔已至巖下  
相隔六十餘里康熊飛等急馳十餘里逆賊數  
千從兩邊山坳突出高連陞揮軍迎敵康熊飛

等亦從後殺入斃賊多名汪逆復率黃衣紅衣  
悍賊層層偪裏都司關鎮邦匹馬直取汪逆胸  
受矛傷猶裹創力戰中槍殞命親兵從死者五  
十餘人各軍憤極康熊飛等大呼陷陣與高連  
陞併力衝殺縱橫決盪賊漸不支詎白水寨及  
沿途各土堡伏賊盡起土匪亦齊出助勢直抄  
官軍之後康熊飛吳光亮等與高連陞四面攻

擊傷賊甚多賊圍始解官軍乘勢殺出復整隊分投接戰土匪四散奔逃汪逆亦同時竄走據被擄逃出之勇丁聲稱十四日行抵黃陂墟隔大隊不過數里忽遇土匪將輜重軍火盡行搶去勇丁被害百餘名高連陞營中落後勇夫概被戕害並訪悉汪逆自關入粵境後黃陂墟羅岡白水寨一帶土匪皆與勾結汪逆因連日受

挫恐不得脫以重金賂該處土匪先給官軍入  
伏而後截奪輜重軍火十六日高連陞康熙飛  
仍整隊往追午刻馳抵羅浮賊已由羅浮過河  
拆斷浮橋竄走查汪逆經官軍疊次剿敗其勢  
已窮詎又勾結土匪乘官軍遠道窮追潛行設  
伏致有此挫現據探報賊已盡入江西邊境兇  
燄復張康國器一軍暫回興甯高連陞劉清亮



兩軍仍跟蹤追勦所望江西各軍能竭力堵遏  
不任闖入或尚可收夾擊之效並請

飭下廣東督撫臣嚴辦土匪以弭後憂力戰陣亡之  
擬保參將都司關鎮邦等相應開列請

旨飭部分別從優議卹奏入

上命軍機大臣傳諭左宗棠瑞麟劉坤一郭嵩燾曰  
汪逆由鎮平竄山經左宗棠督兵追擊疊獲大勝

斃賊一萬數千名甚屬得手前據劉坤一瑞麟等  
各奏稱賊已由江西竄出定南一路直撲龍南已  
屢諭左宗棠盡力窮追並令廣東江西等省各督  
撫會剿堵截著左宗棠仍遵前旨嚴檄各省之軍  
實力追擊瑞麟劉坤一郭嵩燾分路堵截毋任紛  
竄至汪逆由鎮平逃出勢本窮蹙不難立時殄盡  
乃該處土匪竟敢貪受汪逆金帛暗伏要路於高

連陞等追至黃陂墟時突出橫截奪去輜重軍火  
兵勇員弁被戕甚衆以致汪逆得以從容遁去實  
堪痛恨若不趕緊勦滅勢必釀成巨股瑞麟郭嵩  
燾責無旁貸著迅派兵勇將此起土匪會同閩軍  
實力勦洗務須掃除淨盡不准一名漏網力戰陣  
亡之擬保參將都司關鎮邦著交部照副將例從  
優議卹擬保都司外委康達本擬保遊擊守備李

恆王興寶擬保守備把總梁材擬保千總軍功吳世欽均著交部各照擬保官階從優議卹

二十八日

庚寅

左宗棠徐宗幹奏言汪逆全股竄

至小山墟青龍墟洋坑等處分股擾及瑤田距鵝公墟十餘里仍圖由長甯竄江西八月二十一日經王開琳在瑤田擊敗賊知北路不能偷越急欲改道向天花寺旁竄二十二日王開琳

率隊由瑤田進剿賊於嶺路險窄處橫築兩卡以阻官軍王開氣熊常富奮勇當先突入前卡立斬守賊十餘名餘賊驚潰官軍追過烏龍寨賊又砌石卡一座王開琳飭所部三路環擊立將石卡平毀賊衆六七千人排列山岡及田隴一帶蠡擁而來王開琳督各營分路齊進該逆拚死猛撲鏖戰兩時陣斬悍賊五六百名官軍

乘勢追至青龍墟伏賊由兩邊山谷中突出敗賊亦折回死拒適鄧仕高等由右路抄至該逆猝不及防紛紛潰走墮崖死者無數王開氣等由中路追殺亦斃賊千餘名忽小山墟出賊來援方友才督隊力戰王開琳率親兵從後策應羅瑞山等左右兜剿立將後股援賊擊敗追過小山墟里許始行收隊計是役斃賊約數千名

生擒七八百名餘逆悉向天花寺一路逃竄是  
夜王開琳率隊急追行抵白水渡沿途疊有斬  
殺復馳十餘里追及賊之尾隊該逆尙於田隴  
列隊回撲王開琳飭各營分路縱擊斬馘千餘  
追至下厯司羣賊翻山越嶺而遁查汪逆本謀  
竄江因平遠未能竄越遂圖竄長甯茲聞席寶  
田婁雲慶兩軍已折赴南安如能扼其奔衝賊

必伺隙橫出圖擾江粵湘三省邊境劉典一軍  
臣飭其由安遠信豐前進本擬爲攔頭之師詎  
劉典甫抵會昌賊蹤已入龍南刻下局勢惟望  
江粵各軍能分守邊隘截賊出路俟劉典黃少  
春等由南安趕到或可收夾擊之效其高連陞  
康國器兩軍自鎮平克復後窮追六晝夜未稍  
停趾正期得手爲土匪所紿深入伏中輜重軍



火又爲土匪截搶淨盡停追一二日賊蹤業已  
遠颺不能追及矣如賊爲南安官軍所扼折竄  
南雄自當迅速馳勦就閩軍而論賊在江西湖  
南邊境當責劉典黃少春兩軍會合江楚防軍  
夾擊賊竄粵東當責高連陞劉清亮康國器等  
軍會合粵軍夾擊惟當竭力以圖相機進取此  
次勦賊出力之已革總兵王開琳可否請

旨開復革職處分已革參將熊常富可否免其拏問  
軍功鄧仕高可否以守備補用並加都司銜以  
示鼓勵

左宗棠又奏言鎮平克復汪逆已竄江西粵境  
業已無賊臣自毋庸入粵調遣各軍以現在局  
勢而言南安有江軍攔頭席寶田婁雲慶王開  
琳三軍躡擊劉典一軍復從會昌安遠信豐以

向南安而扼湖南桂陽邊隘似大局尙可收夾擊之效然山路處處可通終慮逆賊乘虛突竄官軍皆成尾追之局刻下賊竄江西意圖別覓生路其勢必於江粵湘三省邊界奪路狂奔臣所部各軍均已分道入粵入江其駐漳州者僅祇親兵八百人去賊已千數百里勢不相及文報往還徒滋曠誤兵機最忌遙制臣非敢有意

推諉伏懇

收回節制三省各軍成命俾各將領得免觀望遷延  
實於大局有益

左宗棠又奏言據高連陞稟報八月十五日馳  
赴羅網督軍先進康熊飛繼之沿途詢之土民  
均稱賊已連夜竄走六十里不在羅浮司而羅  
網去羅浮司尙有四十餘里嶺谷深幽樹木叢

雜官軍行二十餘里見山徑愈窄疑其有伏詢  
之士人猶以賊蹤去遠爲辭比高連陞派弁勇  
數十人搜山而進瞥見兩邊山坳伏賊突起卽  
飭張志公曹先德上山搜殺甫將伏賊擊退汪  
逆又親率悍黨數千撲來敗賊亦卽回拒高連  
陞飭錢桂仁所部突前衝殺自督親兵策應逆  
賊愈裏愈厚官軍猛戰斃賊甚多賊勢稍卻適

康熊飛督隊馳至正欲乘勢痛勦詎白水寨及沿途各土堡伏賊盡起從後抄來高連陞以地勢險窄不能展步遂與康熊飛等將前後隊互易且戰且退殺透重圍至地勢稍寬之處排齊隊伍分路向前衝擊該處土匪復糾聚一二萬人四面撲來沿途從逆各土堡亦助施槍礮高連陞與康熊飛等分投迎敵血戰兩時將汪逆

擊敗土匪四散奔逃始收隊回至羅岡該處土匪又出攔路搶殺弁員多傷斃者先是十四日高連陞追賊過大柘石正黃陂墟等處輜重軍火在後相距十餘里被該處匪徒將弁勇盡行殺害輜重軍火搶劫一空高連陞急飭參將鄒朝瑞等馳往查探甫抵黃陂墟復被土匪戕殺羅岡白水寨一帶匪徒又與賊通阻截官軍高

連陞等急於追賊未暇過問十六日仍與廉熊  
飛督隊追勦馳抵羅浮司賊早已連夜遁去復  
追二十餘里至樟樹坪河邊浮橋被賊拆斷欲  
渡無舟高連陞率隊回至羅浮該處土民又復  
閉糴後路土匪充塞軍火糧餉不能轉運不得  
已回駐興甯縣城查高連陞一軍被土匪戕害  
竟至三百餘名之多昨已請



旨飭下廣東督撫臣嚴辦土匪合再據實陳明此次  
力戰陣亡之參將王得盛等相應開列請

旨飭部照陣亡例從優議卹奏入

上命軍機大臣傳諭左宗棠瑞麟劉坤一李瀚章郭  
嵩燾曰賊由粵境竄擾江西定南龍南之交疊經  
諭令左宗棠瑞麟郭嵩燾劉坤一等派兵會剿並  
令李瀚章嚴防楚境茲據左宗棠奏賊竄江西勢

將於江粵湘三省邊界奪路狂奔該督現駐漳州  
去賊甚遠兵機最忌遙制請收回節制三省各軍  
成命等語賊蹤距閩粵較遠左宗棠卽可不必入  
粵惟各路將領必須有威望重臣節制統轄方足  
以一事權不致各懷觀望左宗棠惟當視賊所向  
前往江西居中調度相機勦辦以期迅殄狂氛俟  
此股賊匪殄滅淨盡方能卸此重任所請收回成

命之處著毋庸議劉坤一當飭席寶田等軍乘勝  
痛剿瑞麟郭嵩燾懷遵屢次諭旨督率粵軍跟蹤  
夾擊儘任令該將領遲延觀望縱賊不剿必惟該  
督撫等是問李瀚章仍飭防邊各軍實力扼截不  
得任賊竄突王開琳一軍進駐江西長甯剿賊獲  
勝尙知愧奮已革總兵王開琳著開復革職處分  
已革參將熊常富著免其拏問軍功鄧仕高著以

守備補用並賞加都司銜以示鼓勵高連陞等軍  
奮勇追賊爲粵東土匪截殺戕害竟至三百餘名  
之多實屬形同叛逆著瑞麟郭嵩燾懷遵前旨起  
緊嚴拏盡法懲治力戰陣亡之參將王得盛守備  
李鳳翔都司周興義於長林守備王汝洪千總朱  
傳孝李光斗及被匪戕害之參將鄒朝瑞千總胡  
得貴李起生均著交部照陣亡例從優議卹

欽定勦平粵匪方略卷四百十二 乙丑年

十月初一日

壬辰

劉坤一奏言總兵王開琳於八

月二十二日擊走青龍等墟逆衆之後二十三日追及賊匪於白水渡悍賊四五千人列陳以拒王開琳等分路進擊斷賊陣爲兩該逆登時大潰我軍奮勇掩殺斬馘千計餘匪翻山而逃先是該逆前股竄撲定南廳城經該廳同知王

大枚等登陴守禦礮斃逆衆多人該逆退歸下  
厯墟圍攻橫岡營甚急王大枚復派團勇馳援  
密約橫岡營都司姚元盛內外夾擊賊解圍遁  
去被我軍擒殺百餘人適王開琳追勦後股敗  
匪至下厯墟各鄉團勇截其去路復斃多賊該  
逆悉由八十岡一帶竄往龍南徑赴城下當經  
該縣知縣王家傑督率兵團擊退二十四五兩

日賊更番進攻王家傑等力戰禦之二十五夜  
王家傑挑銳卒數百人縋城而下潛將東門外  
賊營悉數焚燬斬獲甚衆餘悉退往西南終夜  
洶洶有聲王家傑知賊衆已亂於二十六日會  
合團總王文錦帶勇馳擊賊卽敗潰追至里仁  
堡生擒三百三十餘名斬首五百餘級是日賊  
竄至信豐縣屬之小江墟隨於墟前築六大壘

餘衆屯聚三十里內欲俟喘息稍定從鐵石口  
入犯贛南而席寶田已先一日馳抵該處二十  
七日席寶田率師進剿汪逆亦悉衆來迎遇之  
於蓮塘劫賊陣分布五六里席寶田令唐本有  
等分路包抄而令榮維善等踰山直襲小江墟  
巢穴部署甫定賊蠶擁來撲我軍奮力衝擊鏖  
戰逾時賊衆驚潰我軍乘勢掩殺殲戮無數汪



逆奔回小江墟依壘結陣以抗我軍榮維善等  
復從墟背襲破賊壘汪逆不知所措率衆奪路  
以走我軍前後夾擊擒斬不可勝計自小江墟  
至羅吉墟數十里賊館盡行蹋毀汪逆竄向冬  
坑墟席寶田率隊力追賊屍枕藉汪逆背受矛  
傷幾爲我軍所擒是役計殲悍賊萬餘人生擒  
千餘名二十八日汪逆復竄龍南圍攻縣城幸

王家傑尙未解嚴又通判汪承誥等帶勇一千

五百名適於二十七日入城聲威頗壯城守嚴

密該逆無法可施王家傑等以內外隔絕誠恐

餉竭兵譁遂於三十日酌留勇丁守城其餘悉

出決戰各勇亦知賊勢已蹙無不踴躍爭先賊

衆披靡半日之間連破各門之賊鄉團競出邀

擊共計殺賊七百餘名生擒五百餘人餘匪悉

由上蒙堡狂竄出境而去現聞賊衆不過三萬  
能戰者不滿萬人復由江西敗回粵東輾轉於  
和平連平境上勢已窮蹙臣一面飭催各軍越  
境會勦仍聽左宗棠調遣一面馳抵邊防會商  
辦理所有此次尤爲出力各員相應開列仰懇  
天恩給予獎勵陣亡各員並請

旨飭部從優議卹奏入

上命軍機大臣傳諭左宗棠瑞麟劉坤一郭嵩燾曰  
逆匪由青龍等墟敗竄後王開琳一軍追及於白  
水渡斬賊千餘其前股竄撲定南龍南復經擊退  
席寶田馳抵贛南鐵石口一帶扼剿殲除悍賊萬  
餘該逆由江西敗回粵境輟轉於和平連平境上  
勢已窮蹙亟應會集諸軍實力兜剿爲一鼓聚殲  
之計著左宗棠迅赴江西擇要駐紮居中調度檄

飭各軍剋期會剿並著劉坤一飛檄席寶田王開  
琳等軍越境進攻乘勝痛擊迅殲醜黨該逆自鎮  
平克復從西南折竄長甯閩軍窮追數晝夜而粵  
東曾未聞有一騎一卒躡蹤追剿殊屬玩延此次  
該逆被擊勢窮復由江竄入粵境餘衆尙有三萬  
餘人難保不鋌而走險復逞狡謀瑞麟郭嵩燾旣  
無會剿之師嚴扼邊境豈得復以驅賊入粵爲解

卷之四十四  
五  
誘過鄰封著瑞麟郭嵩燾嚴飭粵東在防諸軍與  
江閩官軍相機聯絡協力夾擊務將此股竄匪悉  
數殲除以靖地方儻不能實力堵截致該逆深入  
腹地復形蔓延瑞麟等自問當得何罪

上諭內閣曰逆匪由青龍等墟敗竄後經總兵王開  
琳督隊進攻追及於白水渡斬馘千計餘匪翻山  
而逃該逆前股竄至定南龍南均經擊退斬獲甚

衆旋竄至信豐縣屬之小江墟從鐵石口入犯贛  
南經臬司席寶田率師扼剿屢獲大勝汪逆受傷  
敗遁計殲除悍賊萬餘人生擒千餘人勦辦尙屬  
得手所有尤爲出力之貴州按察使席寶田著加  
恩遇有布政使缺出提奏花翎江西知府補缺後  
補用道謝蘭階著該部仍照原保註冊並賞給固  
勇巴圖魯名號總兵唐本有著賞給赫勇巴圖魯

名號並賞加提督銜已革總兵韓進春著開復原  
官仍交軍機處記名遇有總兵缺出請旨簡放總  
兵龔繼昌著賞戴花翎並賞給該員三代一品封  
典周家良著賞給提督銜副將蔣懷清著賞給赴  
勇巴圖魯名號王學開著賞給長勇巴圖魯名號  
參將劉建業著賞給制勇巴圖魯名號韓孝忠著  
賞給克勇巴圖魯名號遊擊榮維善著免補遊擊



以參將儘先補用並賞給武勇巴圖魯名號卽選  
同知直隸州知州陳寶箴著免選本班以知府不  
論雙單月卽選已革知縣劉長景著免其前叅拏  
問罪名仍留營效力開復總兵王開琳著仍交軍  
機處記名遇有總兵缺出請旨簡放副將羅瑞山  
著賞給格洪額巴圖魯名號遊擊王開氣著賞給  
彥勇巴圖魯名號都司湯有光著賞給勛勇巴圖

魯名號參將會桂堂著以副將補用已革參將熊  
常富仍留營效力以示鼓勵其餘出力各員著劉  
坤一查明彙案請獎陣亡之參將榮光貴都司李  
仲衍把總姚三勝唐寶林外委唐士戎監生廖爲  
儼軍功李道秀均著交部從優議卹以慰忠魂

初四日 乙未 官文奏言欽奉

諭旨令鮑超一軍赴豫助剿伏查該提督向來打仗

專以游勇爲事軍中漫無紀律金口之變覆轍  
不遠霆軍之留上杭者雖目前敷衍無事奈其  
中降衆太多心志不一並未帖然畏服儘聞鮑  
超留楚赴豫之信卽引羣呼類紛紛而來諸多  
窒礙臣愚昧之見該提督旣已於本月初十日  
由楚起程卽催令迅速前進一面請

旨飭下該提督於抵防後如粵省軍務稍鬆迅將婁

雲慶等所部之營由江省籌給欠餉妥爲遣散  
再令單騎赴豫屆時另募新勇痛除積習訓練  
成軍庶資得力奏入

上命軍機大臣傳諭官文劉坤一曰前因豫南軍情  
緊要是以改調鮑超一軍就近由楚赴豫茲覽官  
文所奏以上杭霆軍降衆太多心志不一儘聞鮑  
超留楚赴豫之信紛紛而來諸多窒礙所見亦是

卽著官文傳知鮑超卽馳赴江西將所部新舊  
各軍妥爲部勒相機進兵仍聽左宗棠節制所有  
該軍餉需仍著劉坤一源源撥解毋令缺乏

十一日

壬寅

瑞麟郭嵩燾奏言查漻逆大股遁入

江西龍南定南等處是時東路逆蹤稍遠而南  
雄始興各州縣與江省龍定信豐在在毗連北  
江防勦又復喫緊當飭副將鄭紹忠等軍馳赴

南雄都司鄧安邦扼紮巖下以固邊隘令總兵  
卓興駐紮興甯扼賊由羅浮司出入之路專責  
總兵方耀跟蹤出境與江軍會勦八月二十三  
至二十九等日臬司席寶田提督婁雲慶總兵  
王開琳等合數軍全力扼賊去路屢獲大勝濂  
逆攻龍南未下走信豐鐵石墟復敗回龍南再  
走定南之淩江該逆知南安南雄防兵林立遂

於九月初一日乘夜潛越山徑小路突至和平  
圍撲縣城賊衆兵單初三日致被闖入藩司李  
福泰時駐興甯查辦匪案聞警馳回龍川飛札  
方耀等軍迅速援勦知縣錢廷燾等集團進攻  
斃賊甚夥該逆知大兵踵至初五日盡竄連平  
州屬忠信司初六日直犯州城圍築土牆晝夜  
環攻署知州福多與留防該州之參將朱國雄

登陴堵禦施放大礮轟斃逆匪無算賊始暫退  
初七日夜朱國雄等挑選敢死士三百名銜枚  
出城分三路掩襲賊營破柵而入賊出不意蒼  
黃宵遁生擒二十餘名斬馘甚多初八日該逆  
以馬隊衝至復經我軍擊斃百餘名賊不得逞  
乃由麻坡上坪九連山等處陸續退出並蔓及  
長甯翁源邊界臣等悉心籌畫賊窺長甯則應



防腹地現派鄧安邦等軍一萬餘人赴連平追  
勦兼可顧河源長甯內犯之路賊窺翁源則韶  
州喫重現派總兵王朝治等統帶水師沿江扼  
守阻其西渡並飭總兵任星元等擇隘駐紮以  
杜奔越惟逆匪雖殘敗之餘而黨類尙衆粵省  
兵力稍單戰守兼籌實不足以制其死命臣等  
飛移提臣高連陞等會合閩粵各軍由龍川橫

山連長扼賊四竄之路痛加勦洗另札李福泰  
再派得力數營前往應援務期就地撲滅不留  
餘孽提督銜候補總兵方耀於賊抵龍南追勦  
迄未出境及賊回連和又不馳往截擊觀望遷  
延無可辭咎應請

旨撤銷提督銜暫行革職仍令帶兵勦賊俾贖前愆  
和平縣文武失守詳細情形容俟另行分別查

辦奏八

上命軍機大臣傳諭左宗棠瑞麟劉坤一郭嵩燾曰  
滇逆被江西官軍擊敗回竄粵東闖入和平縣城  
經兵圍擊退遂竄入連平州屬之忠信司復擾及  
長甯翁源邊界賊蹤飄忽異常粵省官軍總未能  
實力堵勦力遏兇鋒瑞麟等現派鄧安邦等萬餘  
人赴連平追勦王朝治等沿江扼守以顧韶州並

飭任星元等擇隘駐紮卽著嚴飭派出各員分投  
防剿毋令賊匪得以深入又形滋蔓賊雖殘敗之  
餘醜類尙衆粵省兵力較單必須江閩援軍合剿  
方可聚而殲旃左宗棠常飭高連陞等軍由龍川  
橫山連長會合粵軍痛加剿洗並著左宗棠察看  
軍情緊要卽親自赴粵節制各省之軍以期事權  
歸一劉坤一卽督令席寶田王開琳等軍越境會

勦不得稍分畛域方耀奉派勦賊於賊抵龍南時  
並未出境追勦迫賊回連和又不馳往截擊實屬  
觀望遷延咎有應得方耀著撤銷提督銜暫行革  
職仍飭該員奮勇勦賊以贖前愆和平縣文武失  
守詳細情形著瑞麟等查明具奏

十二日 癸卯 左宗棠奏言欽奉

諭旨飭查廣東軍務貽誤情形 臣查汪逆之竄踞鎮

平本因計無復之姑假息於此爲賒死之計其  
必不欲久留粵省者緣汪逆籍隸安徽全椒其  
死黨多江北江西湖廣劇賊而與廣東股匪氣  
類攸分也臣之遣康國器關鎮邦兩軍入粵以  
助粵軍而分布各軍以助江西保湖南邊隘者  
蓋謂制流寇之要在審其必出之途伺其竄動  
而要擊之庶可省兵力而策全效閩軍駐武平

邊隘距鎮平縣城四十五里扼賊由閩竄江要  
衝廣東必欲催其入粵而粵軍之分攻鎮平者  
僅方耀一支又距鎮平百餘里迨閩軍分紮鎮  
平之東南北三而江軍進平遠遙扼其西北一  
面粵東所宜防者僅西南一面耳八月初五日  
長樂之賊既已獻城則粵軍卓興一支正可進  
扼興甯乃閩軍於八月初九夜復鎮平縣城即

蹶蹤猛追六晝夜至羅岡已越興甯而前並未  
見方耀卓興之軍而龍川之賊反得與汪逆會  
合並趨江西長甯地界是粵軍徒有會剿之名  
而無會剿之實不圖方耀卓興之貽誤一至於  
此郭嵩燾所陳數誤自係實在情形瑞麟於方  
耀卓興不據實奏參又從而徇縱之此不能爲  
瑞麟解者也郭嵩燾廉謹有餘而應變之略非



其所長

論旨責其負氣責其不據實陳奏而稱疾乞退是郭  
嵩燾咎由自取早在

聖明洞鑒之中至幕友徐灝劣蹟臣無從查知自古  
用兵之際主兵者每因軍務繁重不得不廣辟  
幕僚相助爲理然不得其人亦足誤事瑞麟信  
任徐灝而專事之誤如此則其不能得力亦可

知矣再據高連陞函報八月二十五六等日汪  
逆全股竄至江西定南信豐連界小江墟一帶  
經席寶田婁雲慶等擊敗二十八日退竄龍南  
境內察度賊情又將假道廣東南韶以犯湖南  
而入廣西臣仍當督飭各軍探蹤截勦以期早  
殄逆氛

左宗棠又奏言各軍近以疾疫繁興紛紛具報

蓋師行山谷之間飽受煙瘴又時冒雨忍飢枕  
戈露宿有以致之高連陞劉清亮劉典等軍中  
患疫過半弁勇傳染物故頗多而康國器一軍  
爲尤甚王德榜一軍拔赴汀州後亦患病不少  
惟黃少春一軍尙未據呈報康國器因病勇過  
多懇請暫撤臣以軍事喫緊勉諭其將精銳挑  
留好爲調養高連陞已由興甯前進劉典一軍

已於九月初一日由會昌取道贛州赴南安黃  
少春一軍亦由武平會昌續進劉清亮則尙駐  
江西長甯未能拔行病勇旣須人舁行軍火輜  
重累贅尤甚軍行極爲艱苦然局勢所在又不  
得不疾起赴之臣惟有勉其盡瘁馳驅冀竟全  
功奏入

上命軍機大臣傳諭左宗棠瑞麟郭嵩燾曰粵東軍

務正當防勦喫緊之時瑞麟於布置調度機宜自當虛衷延訪共濟時艱郭嵩燾亦當和衷商酌務求至當不得偏執己見此後該督撫遇有公商事件總當以國事爲重毋許各懷私見再蹈前非方耀於軍務喫緊之際竟敢逗留不進縱賊竄逸實屬玩誤業據瑞麟等奏叅撤銷提督銜革職留營著瑞麟等卽飭令該總兵奮勉圖功以贖前愆儘

再畏憚貽誤卽著嚴叅治罪卓興如不實力勦賊亦著從嚴叅辦勿稍姑息賊蹤現又回竄粵東該省兵力本不如閩軍之精銳且卓興方耀不善駕馭仍恐不能得力必須左宗棠親往督勦方可盡掃狂氛著左宗棠懍遵前旨迅行前往認真勦辦李福泰是否可用有無粉飾貽誤之處左宗棠此次摺內並未提及仍著查明具奏高連陞劉清亮

劉典等軍患疫過半而康國器一軍尤甚該將士  
等爲國勦賊馳驅况瘁近因師行山谷枕戈露宿  
飽受煙瘴以致傳染疫氣物故頗多覽奏之餘曷  
勝憫惻著左宗棠宣布朝廷德意多方拊循妥籌  
醫治給發餉需俾得迅消疹癘益資飽騰以副軫  
恤戎行至意

上諭內閣曰前因郭嵩燾奏廣東軍務約有數誤請

將督署幕友徐灝擯退當經降旨交左宗棠查辦  
茲據奏稱卓興方耀於賊匪退竄之後屢次追剿  
遲誤各情總兵卓興方耀屢以攻勦得力擢至專  
閩宜如何激發天良力圖報稱乃竟恃功而驕而  
瑞麟仍復遷就優容並不早加叅劾殊屬非是著  
瑞麟郭嵩燾隨時察看如該總兵等始勤終怠卽  
著嚴行叅辦不得稍涉姑息瑞麟郭嵩燾以督撫



大員同城辦事自當和衷商酌乃瑞麟於郭嵩燾商辦之事未能虛心體察郭嵩燾因瑞麟未經允從負氣上陳所見殊小均著傳旨嚴行申飭儘經此次訓誡後不思公忠爲國力改前非必將瑞麟郭嵩燾重治其罪瑞麟幕友徐灝旣不得力卽著驅逐出署不准在廣東逗留

十四日乙巳劉坤一奏言臣於九月二十一日行

抵贛州府城據報濊逆等由龍南縣潰退出境  
路經定南廳之佛子坳經該廳紳團邀斬數十  
名賊衆悉趨粵東和平縣往攻連平州爲粵師  
所敗九月初五日回竄龍南縣太平堡一帶復  
經該縣紳團擒斬百餘人席寶田聞警急率精  
毅營馳抵該縣賊乃退踞連平之上坪下坪等  
處分股蔓延始興之清化司翁源之龍仙墟等

處查汪逆狡悍異常聞在連平築壘聚糧以爲  
負固之計實欲懈我軍心伺閒狂竄現楚粵各  
軍旣經遏其去路則江西東南各處必須嚴密  
設防臣一面飭席寶田由龍南剋期進勦與閩  
粵各軍分道夾攻一面咨調總兵婁雲慶一軍  
進紮龍南之新興堡提督周寬世一軍進紮定  
南之下厯司與新老湘營互爲聯絡以固邊陲

又因會昌僅平江勇千數百人長甯瑞金石城  
各縣均屬空虛復留浙江提督黃少春所部暫  
駐信豐藉資策應僞賊仍西竄犯楚臣已與湖  
南撫臣李瀚章豫商卽令候補藩司劉連捷總  
兵朱洪章兩軍由南安馳赴郴桂總兵朱南桂  
一軍由袁州疾趨茶攸併力邀擊其劉典黃少  
春兩軍亦卽相機繼進臣並擬派婁雲慶席寶

田等率師窮追以期殄此餘氛如能在連平境  
內四面圍攻掃除淨盡尤策之善者也奏入

上諭曰昨據瑞麟等奏賊竄和平等處現約閩軍會  
勦已寄諭該撫督軍越境會勦茲據奏布置各情  
並擬派婁雲慶等軍率師窮追與諭旨正相脗合  
著卽會商左宗棠瑞麟李瀚章等分道夾勦以期  
殄滅無遺一勞永逸

二十九日庚申劉坤一奏言臣行抵贛州後卽籌

調各軍赴粵會剿並嚴防江楚各境嗣以信豐  
九渡水實扼贛南各屬之衝復調祥字營三千  
人填紮該處杜賊西竄又以賊若東竄必經和  
平龍川各商廣東督撫務以重兵嚴行防範旋  
據各營稟報席寶田及王開琳擬率精銳營新  
老湘營出境進攻上坪婁雲慶亦由墩頭前進

夾擊賊見諸軍日偏誠恐困於長圍於初九日  
先竄龍南之分水坳當爲團練擊退該逆知此  
路難越於初九夜悉衆由泅頭竄往和平臣飛  
檄各軍確加偵探如該逆已爲和平防師所遏  
卽以席寶田王開琳劉勝祥三軍越境會勦乘  
其徘徊莫定之時一鼓殲滅僞賊越和平以犯  
定南則王開琳率新老湘營馳赴定南下厯司

與周寬世一軍併力迎擊若賊由和平過龍川以犯長甯則王開琳等合趨鵝公墟篁鄉堡邀之精毅祥字兩軍亦卽繼進現已飛咨浙江提督黃少春一軍迅赴長甯如能馳出賊前不惟江省邊防可固卽閩省有警亦易回援儻賊已入長甯則地方遼闊甯撫建饒廣各府屬處處可通精毅祥字兩軍應由定南徑趨安遠會昌



冀得截其去路寔字一軍則循定南以向長甯  
躡賊之後兼顧邊防如賊由平遠鎮平以犯汀  
州則閩省目下兵單可慮江西下游亦在在與  
之毗連當卽派兵由瑞金一帶入閩會攻臣已  
分咨閩粵兩省督撫迅籌堵禦並飭甯都等處  
水陸嚴防以壯聲威

劉坤一又奏言鮑超督率新募勇丁四營自鄂

來江已抵吉安不日即可到贛茲值汪海洋股  
匪自廣東連平州東竄和平江省定南長甯會  
昌等廳縣堵剿喫緊鮑超長於戰陣聲威素著  
爲汪逆所憚且婁雲慶所部仍歸鮑超統領婁  
雲慶循照舊章管理全軍營務行閒將士必能  
勇氣百倍爭先效命臣現已飛咨鮑超星速前  
進視賊所向疾馳痛剿務必窮其所之悉數撲

滅庶免蔓延江閩藉以保衛浙江俟勦辦此股  
事竣應否仍赴兩江督臣曾國藩軍營聽候調  
遣屆時請

旨飭遵至婁雲慶所部餉項向來每月籌給銀五萬  
兩今鮑超又添新募四營應需餉項臣仍當督  
飭藩司勉力籌撥俾資接濟第該營所開薪糧  
公費等項擬與湘楚各軍月餉數目多有參差

該營前在湖北江南征勦有年曾否定有畫一  
章程尙須咨商會國藩覈覆辦理奏入

上命軍機大臣傳諭左宗棠瑞麟劉坤一徐宗幹郭  
嵩燾曰汪逆敗回連平州之上坪等處經席寶田  
等軍分路夾擊該逆始竄龍南之分水坳爲團練  
擊退遂於十月初九日夜糾黨由荆頭竄往和平  
劉坤一現飭席寶田王開琳劉勝祥越境會勦並

令黃少春一軍迅赴長甯節節設備力扼該逆紛竄之路所籌均尙周妥著劉坤一就近嚴檄各軍會同閩粵官軍分路進剿協力兜拏爲一鼓聚殲之計瑞麟郭嵩燾務當督飭在防將士嚴密堵禦遇賊卽擊迅殄逆氛毋得專待客兵致誤戎事該逆奔突無定難保不由平遠鎮平以犯汀州應如何扼要設防杜賊回竄著左宗棠徐宗幹妥籌辦

理鮑超不日即可到贛現在汪逆東竄和平江省  
定南長甯會昌等處正在堵剿喫緊之際卽著劉  
坤一知會鮑超統率婁雲慶等軍星速前進視賊  
所向疾馳痛剿鮑超新募四營應需餉項並著劉  
坤一督飭藩司竭力籌撥俾資接濟至該營所開  
薪糧公費等項與湘楚各軍月餉數目多有參差  
如何覈實支放以歸畫一之處著咨明曾國藩妥

